

- राज्य सरकार साफ कीनो-कृषि मंत्री किरोड़ी लाल मीणा रा फोन टेप नी करायी ज्या-विपख रा सदस्य ई मुद्दा माथे सदन ऊं बाहर निकळ्या।
- देशभर मांय आज गैर संक्रामक रोग स्क्रीनिंग अभियान सुरू व्ह्यो-लोगां रा स्वास्थ्य री जांच करी जावेला।
- बुनकर सेवा केन्द्र री ओर ऊं जयपुर मांय आज “हथकरघा एक्सपो त्यौहार” सुरू व्ह्यो।
- चैंपियन्स ट्रॉफी क्रिकेट रा तैत आज दुबई मांय बंगलादेश भारत ने जीतण सारु 229 रन बणावण रो लक्ष्य दीनो-मोहम्मद शमी पांच विकेट लीना।

000

राज्य सरकार आज विधानसभा मांय साफ कीनो सरकार री ओर ऊं कृषि मंत्री किरोड़ी लाल मीणा रो फोन टेप नी करायी ज्यो। विपख रा सदस्यां री मांग परां विधानसभा अध्यक्ष आज सरकार री ओर ऊं ई मामला मांय जवाब देवण रो टेम तैय कीनो। गृह राज्य मंत्री जवाहर सिंह बेढ़म सरकार री ओर ऊं जवाब देता थकां कह्यो के कानून व्यवस्था ऊं जुड़्या मुद्दा या राज्य री हिफाजत सारु जरूरी व्हेवण री सूरत मांय गृह विभाग रा अतिरिक्त मुख्य सचिव किण ई रा फोन री निगराणी राखण री मंजूरी दे सके है। वे कह्यो के मुख्य सचिव री सदारत वाळी समिति इण माथे ओजू विचार करे है जिण री मीटिंग महीना मांय दो दफा व्हे है। ई माथे सदन मांय विपख रा नेता टीकाराम जूली कह्यो के श्री मीणा जिम्मेदार ओहदादार है अर गर सरकार वां रा फोन टेप नी करायो है तो ई बारा मांय दिया ज्या बयान सारु सरकार ने डॉ. किरोड़ी लाल मीणा रे खिलाफ कार्रवाई करणी चाहिजे। विपख रा सदस्य मंत्री डॉ. मीणा रे खिलाफ कार्रवाई करण री मांग करता थकां सदन ऊं बाहर निकळ ग्या।

000

भारतीय जनता पार्टी री विधायक रेखा गुप्ता आज दिल्ली रा मुख्यमंत्री ओहदा री शपथ लीनी। दिल्ली रा उपराज्यपाल विनय कुमार सक्सेना वां ने पद अर गोपनीयता री शपथ दिरायी। मुख्यमंत्री सागे छह कैबिनेट मंत्रियां ने ई शपथ दिरायी ज्यी। ई मौके प्रधानमंत्री नरेंद्र मोदी, गृह मंत्री अमित शाह, रक्षा मंत्री राजनाथ सिंह अर केई केंद्रीय मंत्री ई मौजूद रह्या। मुख्यमंत्री भजनलाल शर्मा समेत केई राज्यां रा मुख्यमंत्री अर उपमुख्यमंत्री ई जळसा मांय मौजूद रह्या।

000

देश मांय आज विशेष गैर-संक्रामक रोग स्क्रीनिंग अभियान सुरू करी ज्यो। इण रो मकसद 30 साल अर बत्ती उम्र रा लोगां री गैर-संक्रामक बीमारियां, शुगर, बी.पी., मुंह, स्तन अर गर्भाशय ग्रीवा रा कैंसर री जांच करणो है। चालीस दिन ताई चालण वाळो ओ अभियान, आयुष्मान आरोग्य मिन्दरां अर देश भर मांय न्यारा-न्यारा स्वास्थ्य केन्द्रां माथे राष्ट्रीय गैर-संचारी रोग रोकथाम और नियंत्रण कार्यक्रम रा तैत चलायो जा रह्यो है। अभियान रे दौरान आशा अर फ्रंटलाइन कार्यकर्ता घर-घर जा र ऐड़ा लोगां री जांच करेला।

000

राज्यपाल हरिभाऊ बागडे अलवर रा राजर्षि भर्तृहरि मत्स्य विश्वविद्यालय रा 6 करोड़ 165 लाख रुपया रा विकास रा कामां री नींव रखी। ई मौके राज्यपाल आं कामां रे मार्फत आवता बगत मांय कॉलेज शिक्षा रा हलका मांय बेहतर विकास री आस जतायी। ई मौके अलवर रा सांसद अर केन्द्रीय वन मंत्री भूपेंद्र यादव अलवर मांय टाबरियां सारु सैनिक स्कूल खोलण रा ऐलाण परां खुशी जताई।

000

मुख्यमंत्री भजनलाल शर्मा केन्द्रीय शिक्षा अर कौशल विकास मंत्री धर्मेन्द्र प्रधान सागे नई दिल्ली मांय मुलाकात कीनी। श्री शर्मा केन्द्रीय मंत्री सागे प्रदेश मांय भणार्ई-लिखाई री व्यवस्था अर कौशल विकास रा बारा मांय चर्चा कीनी। मुख्यमंत्री नौजवानां रा कौशल विकास रा न्यारा-न्यारा कोर्स री जरूरत बतायी।

000

सहकारिता राज्य मंत्री गौतम कुमार दक कह्यो है के ई साल अंतर्राष्ट्रीय सहकारिता वर्ष रे दौरान राज्य मांय सहकारी आन्दोलन ने और मजबूत बणावण अर बत्ता ऊं बत्ता लोगां ने इण ऊं जोड़बा री कोशिश करी जावेला। वे आज जयपुर मांय सहकारिता कार्य योजना और कलैण्डर विमोचन कार्यक्रम मांय बोल रह्या हा। दक कह्यो के राज्य रा बजट मांय सहकारिता ऊं जुड़्या केई खास ऐलाण करी ज्या है, जिण ऊं प्रदेश मांय सहकारी आन्दोलन और तेज व्हेला। कार्यक्रम मांय प्रदेशभर ऊं सहकारिता विभाग रा अहलकार अर कर्मचारी वीडियो कॉफ्रेंस रे मार्फत शिरकत कीनी।

000

प्रयागराज मांय चाल रह्यो महाकुंभ मेळो आध्यात्मिक समागम सागे साफ-सफाई अर पर्यावरण ने बचावण ऊं जुझ्यो मोटो आन्दोलण ई बण ग्यो है। मेळा मांय लगायी ज्यो नमामि गंगे मंडप, गंगा नदी ने बचावण अर सफाई रा महत्त्व रा बारा मांय जाग जगावण रो अनोखो मंच बण ग्यो है। इण मांय नुवी तकनीक अर रचनात्मक प्रदर्शन सागे गंगा नदी रे किनारे मिलण वाळी जैव विविधता रो दरसाव करे है। महाकुंभ रे दौरान नमामि गंगे मिशन रा तैत साफ-सफाई अर जागरूकता अभियान ई चलायो जा रह्यो है। ई रा तैत 'गंगा सेवादूत' सफाई राखण बाबत जाग जगा रह्या है। महाकुंभ मांय गंगा टास्क फोर्स, खुद सेवक संगठनां अर जातरुआं री मदद ऊं नदी रा घाटां माथे सफाई करी जा रही है। दुनिया रा सब ऊं मोटा ई धार्मिक आयोजन रे दौरान, नमामि गंगे मिशन नदी रा पाणी री शुद्धता तैय करण अर इण री पवित्रता बणायी राखण सारु 10 सीवेज ट्रीटमेंट प्लांट ई काम कर रह्या है। ई बीचे, केन्द्रीय कृषि राज्यमंत्री अर सांसद भागीरथ चौधरी अजमेर ऊं प्रयागराज सारु आज खास रेलगाडी ने रवाना कीनी। ई गाडी मांय 1300 जातरु सफर कर रह्या है। ई मौके सांसद चौधरी महाकुंभ ने आस्था रो केन्द्र बतायो।

000

चूरु जिला मांय राष्ट्रीय खाद्य सुरक्षा योजना रा तहत 2 लाख 85 हजार ऊं बत्ता पिरवारां ने जोड़ी ज्या है। म्हाणा खबरनवीस बतायो के जिला मांय 62 फीसदी लक्ष्य हासिल कर लियो ज्यो है।

000

कपड़ा मंत्रालय रा बुनकर सेवा केन्द्र री ओर ऊं आज जयपुर मांय "हथकरघा एक्सपो त्योहार" सुरु करी ज्यो। इण रो उद्घाटन जयपुर री सांसद मंजू शर्मा कीनो। ई मौके सांसद कह्यो के ओ कार्यक्रम देशभर रा बुनकरां अर कारीगरां सागे शिल्प कला प्रेमियां सारु बेहतरीन मौको है।

केन्द्रीय संचार ब्यूरो जयपुर री अपर महानिदेशक ऋतु शुक्ला कह्यो के हथकरघा एक्सपो ऊं बुनकरां ने वां रा सामान जनता ताई पूगावण रो मौको मिले है। कार्यक्रम मांय बुनकर सेवा केन्द्र री उपनिदेशक रुचि यादव बतायो के एक्सपो मांय न्यारा-न्यारा राज्यां रा बुनकर हाथ ऊं बण्या सामान रो दरसाव कर रह्या है। वे बतायो के एक्सपो मांय हैंड ब्लॉक प्रिंटिंग अर कोटा डोरिया साड़ी बणावण रो मौके ई दरसाव कर्यो जावेला। आ प्रदर्शनी 24 फरवरी ताई चालेला।

000

टोंक जिला रा नगर फोर्ट पुलिस थाणा रा एक कर्मचारी कानी ऊं अनुसूचित जनजाति रा एक जणा री ट्रैक्टर चढा र हत्या करण रा मामला मांय राज्य मानवधिकार आयोग अजमेर रा संभागीय आयुक्त अर पुलिस प्रशासन ऊं रपट मांगी है। न्यायाधीश जी.आर. मूलचंदानी वारदात रा आरोपित सगळां लोगां रे खिलाफ जरूरी कार्यवाही करण रा हुकम दीना है। ध्यानजोग है के नगर फोर्ट मांय एक जणा कानी ऊं लाउड स्पीकर चलावण परां एक पुलिस वाळो रीस कर र वां माथे ट्रैक्टर चढा दीनो, जिण ऊं वां जणा री मौत व्हे ग्यी।

000

आईसीसी चैंपियन्स ट्रॉफी क्रिकेट रा तैत आज दुबई मांय बंगलादेश भारत ने जीतण सारु 229 रन बणावण रो लक्ष्य दीनो है। टॉस जीत र पैली बल्लेबाजी करता थकां बंगलादेश री टीम 49 ओवर अर 4 गेंद रा खेल मांय 228 रन बणा र आउट व्हे ग्यी। हृदोय सब ऊं बत्ता 100 रन बणाया। जे. अली ई 68 रन रो योगदान दीनो। भारत री ओर ऊं मोहम्मद शमी 5, हर्षित राणा 3 अर अक्षर पटेल 2 विकेट लीना। जवाब मांय भारत आखिरी समाचार मिलण ताई 4 ओवर 1 गेंद रा खेल मांय 22 रन बणा लीना हा अर वां रो कोई बल्लेबाज आउट नी व्ह्यो हो। इण ऊं पैली बंगलादेश टॉस जीत र पैली बल्लेबाजी करण रो फ़ैसलो कीनो। टूर्नामेंट मांय भारत रो आगलो मुकाबलो दीतवार 23 फरवरी ने पाकिस्तान ऊं व्हेला। टूर्नामेंट रा काल व्ह्या उद्घाटन मुकाबला मांय न्यूजीलैंड मेजबान पाकिस्तान ने 60 रन ऊं शिकस्त दीनी।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय ई दीतवार 23 फरवरी ने विचार बतावेला। आ ई कार्यक्रम री 119वीं कडी व्हेला। ई कार्यक्रम सारु आप ई काल ताई मुफ्त नम्बर 1800-11-7800 माथे राय भेज सको हो। ई रे अलावा 1922 नम्बर माथे मिस्ड कॉल रे जरिये मिल्या लिंक ऊं ई राय दी जा सके है। आप नरेंद्र मोदी एप अर माई जीओवी ओपन फोरम रे जरिये ई राय दे सको हो।

000